

幸魯盛典

六冊

幸魯盛典卷十九

康熙二十五年丙寅四月

命以宋儒周惇頤後爲世襲五經博士

左僉都御史姚締虞

題爲

聖心重道方殷先賢表彰未盡亟請

勅議褒恤以昭

盛治之曠典事

臣惟我

皇上德盛化神治隆道備崇重

先師之典禮錄恤周公之子孫

恩綸屢沛炳若日星猗歟盛哉真千載一時矣乃有以
一人而當理學絕續之關躬繼往開來之任上接
孔孟下啓程朱厥功甚鉅而表揚未及若不及今
陳請徒令世遠人湮臣請得爲

皇上陳之臣按道學之傳孔孟而後荀楊之徒不精不
詳泊乎五季昏昧已極宋儒道州周惇頤出直接
孟氏之傳太極圖說闡河洛之精微易理通書闢
天人之秘蘊潛修默契闢極而章洛人程珦遣二
子顥頤受學焉皆能唱鳴道學以大發有宋一代
之盛故朱熹之序惇頤曰世所謂二程先生者其

原蓋自先生發之也可謂不忘所自矣

臣

又按宋

嘉定十三年諡惇頤爲元公其辭曰先生博學力行會道有元脈絡貫通上接乎洙泗條理精密下逮乎河洛以元錫名庶幾百世之下知孟氏之後明聖者必自濂溪始淳祐元年追封汝南伯元延祐六年加封道國公明正統元年葺理惇頤祠墓優免子孫差役景泰六年查道州周惇頤嫡長子孫一人周冕授翰林院五經博士世襲撥給墓田至明季而遂失其傳矣竊念先有惇頤然後有程朱今二氏世襲勿替而惇頤子孫淪落祠地荒圯

揆之典章不無掛漏幸逢我

皇上崇儒重道理學修明

臣請

勅廷臣集議詳考惇頤當理學絕續之際啓程朱道脈
之傳卽行楚撫查其子孫果否曾世授五經博士
特賜洪恩酌加恤錄不惟慰先儒於地下亦可以勵百
世之人心矣奉

旨九卿詹事科道會議具奏

禮部等衙門

題前事

臣等議得查順治十二年禮部

題明將朱文公十五代嫡孫朱邦相之子煌承襲傳

士又查康熙九年據河撫郎廷相

題請禮部

題覆將程顥程頤之後裔程宗昌程延祀准襲五經
博士各在案周惇頤上接孔孟下啓程朱其後裔
亦應照程朱之例准給博士之職以彰

皇上闡明理學之盛典俟

命下之日行文該撫詳查周惇頤嫡派并取各結及周
氏之宗譜一併移送到日由禮部查明將應授之
人具

題准授世襲五經博士可也奉

旨依議

附錄○周惇頤字茂叔號濂溪道州人輔成之子累官至廣東轉運判官提點刑獄以洗冤澤物爲已務尋因疾求知南康軍爲學不由師傅默契道體所著有通書太極圖說嘉定十三年賜諡曰元公淳祐元年封汝南伯從祀孔子廟庭

臣按宋儒黃幹曰道之正統待人而後傳自周以來任傳道之責者不過數人而能使斯道之較著者一二人止耳由孔子而後曾子子思繼其微至孟子而始著由孟子而後周程張子繼其絕至朱

子而始著則濂溪處絕續之交能肩荷斯道開闢
肇端以待來者誠理學之功臣宋儒之領袖也我
皇上聰明時憲道積於躬

秉一中而允執

集千聖之大成亦既參天兩地窮神知化矣在昔

先師鈎河摘洛以啓苞符之秘而惇頤太極通書闡
揚突奧復乃曲暢旁通

皇上萬幾之暇緝熙亶心統貫於三古四聖之微言而
博採於有宋諸儒之緒論伏見往者嘗

親書太極圖說以賜廷臣蓋惇頤之書久矣有當於

聖心夫是以加恩後人而錫之世爵也越一年而張載之後亦授官自是濂洛關閩之子孫皆食其舊德而其源流倫敘釐然秩然矣

康熙二十六年丁卯五月

命以宋儒張載後爲世襲五經博士

戶科給事中汪晉徵

題爲

聖心重道日隆先賢表彰有待仰祈

勅議褒錄以全一代之鴻規以重百世之大典事切

臣

於本月二十二日隨九卿齊集內閣仰瞻我

皇上御撰

至聖先師孔子廟碑

親灑宸翰

臣

口誦心維其文則日星雲漢其詞則訓詁

典謨其書則銀鈎鐵畫玉粹珠圓洵足籠罩古今

蘊含造化以孔子而得此至文實聖道之大幸

臣

等生際唐虞之世得觀光華復旦之章尤

臣

等之

大幸也總由我

皇上天縱聖明於堯舜孔孟之傳實有心得故尊崇之
典有加無已切思自孔孟以後道學之緒至宋周
程張朱而始著此四姓五人者名號竝懸於天壤

之間學問皆徹乎性天之始以故祀典均昭藝林
咸頌乃程朱二氏固已久置世襲博士卽周惇頤
復蒙我

皇上允憲

臣

姚締虞之請錄其子孫亦爲博士是四姓

五人同功一體而四人者俱承雨露世襲勿替獨
張載一人子孫淪落衰恤未加按張載係陝西鳳
翔府郿縣人學者稱爲橫渠先生其所著正蒙西
銘諸書闡往聖之精微爲後學之津筏程顥曰西
銘之言極純無雜秦漢以來學者所未到其推重
如此且見我

皇上頒賜先賢書院學達性天匾額周程張朱邵五人

均屬一例則知

聖心藻鑑原無二視伏乞

勅廷臣集議卽行泰撫查其子孫

特賜洪恩使得與周程朱三氏一體恤錄則萬年理學之所尊崇卽萬世人心之所振起矣奉

旨九卿詹事科道會議具奏

禮部等衙門

題前事該_臣等會議得戶科掌印給事中汪晉徵疏

稱

皇上天縱聖明於堯舜孔孟之傳實有心得故尊崇之
典有加無已自孔孟以後道學之統至宋周程張
朱而始著此五人者名號竝懸於天壤之間學問
皆接乎性天之始以故祀典均昭乃程朱二氏固
已久置世襲博士其周惇頤子孫亦爲博士獨張
載一人子孫淪落褒恤未加其所著正蒙西銘闡
往聖之精微爲後學之津筏

皇上頒賜先賢書院學達性天匾額周程朱張邵五人
均屬一例其子孫與周程朱三氏一體恤錄等語
查順治十二年八月內據江南布政使司呈請朱

熹子孫朱煌承襲博士等因禮部具題授爲世襲
五經博士康熙九年五月內禮部題覆臺臣條奏
程顥程頤子孫程宗昌程延祀授爲世襲五經博
士康熙二十四年四月內九卿詹事科道會議都
察院左僉都御史姚締虞條奏周惇頤後周嘉耀
擢爲世襲五經博士俱在案張載關中大儒與濂
洛並重相應將張載子孫亦照周程例授爲博士
俟

命下之日行文該撫詳查張載嫡派并取各結及張氏
宗譜移覆到日由禮部查明應授之人具

三會盛典 卷十九
題准給世襲五經博士可也奉

旨依議

附錄○張載字子厚長安人舉進士爲祁州司法
歷渭州僉判召爲崇文殿校書同知太常禮院爲
人志氣不羣初喜談兵及釋老書反而求之六經
旣見二程子盡棄異學而學焉神宗立詔問治道
以漸復三代爲對與執政不合告歸危坐一室潛
心精思教人以禮關西之士翕然宗之所著有東
銘西銘正蒙擴聖賢所未發嘉定十三年賜諡曰
明公淳祐初封郿伯從祀孔子廟庭

臣按宋代理學啓於濂溪盛於二程而橫渠起於關中羽翼而倡和之游酢至稱其學成德盛比諸孟子非阿所好也觀其言曰爲天地立心爲生民立極爲前賢繼絕學爲萬世開太平此其任道之勇救民之切與孟子亦何以異耶周程朱氏皆得世職以奉烝嘗而張氏缺焉莫問幸遇我

皇上崇禮

至聖推及於聖賢先儒而橫渠之後始得與諸儒裔一體邀千古未舉之典待

聖明而乃備焉此則振起文教之大用匪但儒門生色